

嘯亭雜錄

清禮親王昭槤著

第二冊

進步書局校印

東坡先生詩集卷之四
蘇軾詩集卷之四
蘇軾詩集卷之四
蘇軾詩集卷之四
蘇軾詩集卷之四
蘇軾詩集卷之四
蘇軾詩集卷之四

嘯亭雜錄卷之五

清 汲修主人著

緬甸歸誠本末

緬夷古朱波地。自古不通中國。宋寧宗時。史志始有其名。元世祖遣兵三征之。責其貢賦而還。明初設宣慰司。聊以羈縻。間亦嘗修貢賦而還。其事詳正史。其時緬地不過數千里。附近之提涼猛養猛拱猛密司蠻暮木邦落卓來卡猛迺擁會金坎母得馬大山宋賽錫箔猛樟猛素孟良整欠整賣諸大土司。尚非所有。及莽體瑞之子莽應裡漸強盛。明所設三宣六慰大抵皆服屬於緬。本朝順治十五年。大兵破貴州。明主由榔奔緬甸。時定西將軍愛星阿吳三桂等。於十八年十一月入緬。師至木邦。白文選降於茶山。康熙元年。緬酋自相篡弒。殺明宗室。及黔國公沐天波等數百人。將軍等索明主。緬人不與。師至阿瓦。緬人懼。遂獻明主。師歸。緬人遂不通朝貢。其世次亦不可考。至雍正九年。緬酋與整邁構兵。緬目蟒古叮。在九龍江。遇守備燕鳴春。有告知國王。明年進貢之語。鄂文端公以聞。得旨宜聽其自然。不必有意設法誘致。乾隆十一年。開茂隆廠。雲南永昌順寧。徼外有狽狽。其地北接耿馬土司。界西接

木邦界南接生狝狉界。東接孟艮土司界。地方二千餘里。其長曰蚌筑。自號葫蘆王。不知其所自始。有世傳鐵印。緬文曰法龍湫。諸木隆華。言大小箐之長也。所居木城。草房。戴金葉帽。似盔。穿花衣。俱跣足。夷民山居穴處。以布纏頭。敝衣短褲。刀耕火種。軍器惟刀鏢弓弩。又有夷目蚌坎。幸猛莽恩莽。俱係蚌筑弟兄叔姪。分掌地方。亦不屬於緬酋。免耿馬土司罕世屏代稟稱。願歸順境內。茂隆廠自前明開採時。甚旺。廠民吳尚賢等議給山水租銀。不敢受。請照內地廠例。抽課報稅。以作貢物。總督張允隨奏言。葫蘆乃係化外野夷。輸誠內附。請將此項廠課。飭令減半抽收。一半賞給該酋長。以慰遠人之心。得旨允行。十三年。鎮康土司刀悶鼎報緬夷願通職貢。不許。十四年二月。茂隆廠吳尚賢入緬甸。先是。迤西道承差賈興儒。奉差往茂隆廠訪緝。緝犯鄒啟周張寬果等。茂隆廠委吳尚賢。於十二月丙戌。派帶練兵一百餘人。分起前往訪緝。壬辰。吳尚賢帶練兵八百餘人。賈興儒隨同自廠起身。癸卯。至幹猛。十五年正月朔日乙巳。廠練已擒鄒張二犯。至幹猛。押解回廠。吳尚賢帶練兵一千二百餘人。前赴緬甸。時上年緬人所遣土目五人。請進貢者。尚在鎮康。吳尚賢要令前導。丁未。自幹猛起程。庚戌。至木邦。木邦令頭目猛占等八十餘人從之。丁巳。至錫箔。

庚子。至宋賽。吳尚賢等於所過土司地方。皆有餽遺。遂致書於貴家。貴家者。隨明主入緬之官族。其子孫淪於緬。自署曰貴家。據波龍廠採銀。貴家頭目宮裡雁素與緬甸有隙。因率兵阻之。吳尚賢至麻里脚洪。又遣人致書講和。貴家羈其來使。吳尚賢遂會緬兵三千餘人。至德嶺城與貴家數挑戰。三月庚戌。貴家出迎敵詐敗。吳尚賢前赴之。為貴家所敗。緬甸復遣人和解之。吳尚賢渡麻里脚洪回廠。賈興儒於五月癸丑。帶張寬果回大理。尚賢意欲邀功。因謀說緬酋莽達拉遣使入貢。莽亦荒淫無道。眾叛親離。遂從其言。具表來降。十五年七月。葫蘆茂隆廠課長吳尚賢稟稱。緬甸國王莽達拉情願稱臣納貢。永作外藩。命工匠製造金銀二鈔。篆刻表文。又造貼金寶塔。裝載黃亭毡緞緬布土物。各色馴象八隻入貢。又貢皇太后馴象二隻。毡緞緬布等物。差彼國大臣一員。頭目四人。象奴夷眾數十人。出境過江。於四月已抵邊界。請代表。督撫令司道會議。布政使宮爾勸會按察使糧鹽迤東迤西四道議。以前鎮康土州刀悶鼎稟報。緬酋請通貢已不許。今稟內絕不言及。且明置緬甸宣慰司。表內未稱宣慰舊銜。又有蟻穴自封夜郎天外之言。更不敘明使臣銜名。吳尚賢前稟與今稟。又復互異。至木邦乃緬甸所轄。中外攸分。准木邦投誠。木邦即緬甸之叛

逆必至大起釁端。亦有妨於國體。吳尚賢初到廠地。恃強凌弱。今率緬甸來歸。實有邀功之意。且外國歸誠。亦斷無借一廠民為媒。進將來緬甸設有寇警。必另求援兵。不應則失統御之體。應之則苦師旅之煩。恐鞭長莫及。反難善處。况前明頻通賦貢。受侵擾者數十年。我朝久置包荒。獲寧謐者百餘載。邊境之救寧。原不關乎遠人之賓服。其不可信及不可行者各四。而巡撫圖爾炳阿。竟據稟詞。並表文入告。表文曰。緬甸國王莽達拉謹奏。盛朝統御中外。九服承流。如日。月經躔。陽春煦物。無有遠近。羣樂甄陶。至我皇上。德隆三極。道總百王。洋溢聲名。萬邦率服。緬甸近在邊徼。河清海晏。物阜民和。知中國之有聖人。臣等願充外藩。備物致貢。祈准起程。由滇赴京。仰觀天顏。欽聆諭旨。云云。十六年六月。得旨。准貢。凡筵宴賞賚。一應接待事宜。俱照各國王貢使之例。以示綏懷。因遣官伴使赴京入貢。至十月。貢使回滇。尋逮吳尚賢。尚賢本無籍馬脚於茂隆山開廠。督臣張允隨僉委充當課長。積私財捐通判職銜。於廠地製造鎗刀弓弩。張黃蓋以自豪。年來侵酋長賞銀三萬二千餘兩。前誣鄒啟周搶掠外域致死。後令楊公四等於廠外地鎗斃客民彭錫爵。經屍弟彭錫傑控告。是歲充通事隨緬使入貢。於途挾重貲。招搖生事。總督愛必達奏請

革職於十六年九月。拏審擬大辟。旨未下。瘐死於獄。十七年三月。敏家攻阿瓦。破其城。上年十一月。緬國貢使回抵耿馬。即聞滾弄江外有警。十二月。耿馬土司罕國楷遣人伴送緬使至木邦。先是六月內。緬酋遣子糯喇他蟒左。同弟色亢瑞凍。至猛迺城。迎貢使未至。是年三月。敏家破阿瓦城。以率敏拖五八喇扎居之。緬酋避居約提。即曼撒壩等處。居無定所。其子糯喇他蟒左。亦避居錫箔。四月。緬使抵猛迺。搭建亭閣貯勅旨。御賜欲俟其國平定始旋。十八年九月丙寅。木梳頭人甕藉牙與貴家戰勝之。乃令貴家及約提即之兵共五千人圍敏家。又景賣卡普幹官之子占朶蟒率眾至猛迺。亦欲據緬。十九年正月。緬使及緬酋子遣人齎蒲葉書至耿馬。未及回國。緬酋莽達拉。即為得楞錫箔所殺。子色亢瑞凍出奔。緬國無主。甕藉牙起兵。聲言復仇。糾合緬屬各土目。擊敗得楞諸夷。遂自立於木梳城。尋徙阿瓦。凡緬國舊屬土司。皆遣人降服之。有不服者。輒治兵攻擊。無虛日。貴家據波龍廠採銀。向有歲幣。至是不復輸。甕藉牙擊潰之。追至猛迺。獲所貯勅書。御賜遣人四出求緬酋。子色亢瑞凍。避入木邦。甕藉牙追之。二十年六月。耿馬孟定等土司。以木邦警聞。十月辛亥。色亢瑞凍挈妻喇打那疊玉及親屬頭目男婦等八十餘人。緬僧二人。渡江。

入猛卯。總督愛必達巡撫郭一裕會檄猛卯土司衍珣遣之使去。越二日始出境。甕藉牙猶遣人在木邦城徵象隻索童女。木邦土司罕蟒底乃置色亢瑞凍於滾弄江內。二十一年二月復遷至蠻弄寨。建草樓數楹。夷衆挈盒餽饗焉。益逼近內地之耿馬鎮。康督撫會檄防禦甚嚴。六月壬辰景賣屬之猛放緬目波顛遣老緬四人來迎。色亢瑞凍遂挈家由白沙水渡滾弄江而南。波顛率衆五十餘人迎赴猛放。猛放至木邦計三十餘程。此後遂莫知其蹤。二十三年二月緬首甕藉牙攻陷木邦。木邦在耿馬外。為耿馬孟定鎮康孟連之藩籬。落卓土司地大而強。甕藉牙據有阿瓦落卓首先歸附。於是甕藉牙寇劫波龍廠。遂威脇木邦。索其賄。貴家宮裡雁與結些國人糾約廠衆。至木梳舖劫殺兵始退。時緬首莽達喇之族弟占朶莽者先分居景邁宮裡雁遙附應之。十二月宮裡雁謀攻落卓。會占朶莽及木邦土官之弟罕黑。至落卓劫殺落卓大敗。復引緬首甕藉牙及各土酋之兵謀攻貴家及木邦。以泄其忿。二十四年三月落卓先鋒兵六千餘人至腊戍。是時占朶莽率猛交兵一千人駐猛迺。乘落卓兵練遠出。間道已赴落卓。木邦土司罕蟒底聞緬甸落卓兵至。乃屯發練堵禦。遂遷其家屬於大橋邦囊。翼日與宮裡雁出白小坡與落卓決戰。越二日木邦城

陷罕蟒底奔蟒憂家屬渡滾弄江。至那離。又遷於錫峨。緬兵入踞木邦。人民逃竄。波龍廠衆多歸於內地。沿邊土司撥練防守。宮裡雁率兵練男婦二千餘人。渡滾弄江。奔蠻東蠻弄。勢甚窮蹙。又由白沙水駐南湖。欲假道孟良耿馬。往犴狔。求占朶蟒所在。會兵復戰。而占朶蟒已襲破落卓。率兵練還救木邦。木邦復定。罕蟒底宮裡雁復渡江回永昌。鎮府聞報。率兵二百名。於四月辛酉出禦。行抵姚關。旋即撤回。二十五年。緬酋甕藉牙死。其子莽紀覺嗣。與各部構兵如故。二十七年正月。宮裡雁被緬酋追殺甚急。由猛榜奔至耿馬。又由孟定之邦模南板入莽旦。窮蹙無歸。五月丁酉。至猛戛。並至孟連之猛尹。散處各村寨。初。宮裡雁自阿瓦奔出。帶練一千三百人。至木邦。撥給占朶莽五百人。實止帶練八百人。又脇從阿瓦緬子。木邦獯夷及擄掠男婦共三千餘人。既抵猛尹。猛尹頭目率衆驅之。宮裡雁乞內附。寄住孟連地方。孟連土司刀派春。遂赴猛尹。收其兵器。戶索銀三兩。將其衆安插於猛尹。各圍寨。宮裡雁不欲受土司管轄。已相嗟怨。總督吳達善知其有七寶鞍。乃亡明至寶。太監王坤由北京內庫竊去者。向其索取。宮裡雁以其祖宗所傳重物。愆不與。吳遂挈其妾婢六人。赴石牛廠。刀派春率宮裡雁之妻孥。占及男婦一千餘人。至孟連城。刀派春又向

擄占及頭目撒拉朶。索牛馬童女。以賄吳達善。擄占忿。於閏五月丁丑夜。糾眾焚殺孟連城。刀派春家屬三十餘人。俱被害。逃免者僅應襲。刀派先及刀派春妾二人。戍寅。擄占撒拉朶率眾逃散。至猛養犴犴各處。刀派春族兄刀派英聞變。率練追剿。而猛養犴犴兩處夷眾亦各要路刦殺。擄占大敗。逃竄無踪。派英寄信石牛廠民龍得位王天和等。將宮裡雁好為欸留。宮裡雁實不知也。七月。永昌守楊重毅檄耿馬土司罕國楷帶練誘擒宮裡雁。並其妾婢六人。及另行拏獲之餘黨阿占阿九二人。因解赴省。布政使姚永泰曰。孟連之變。雁不與知。况其夫妻不睦。雁是以避居兩地。今若留雁。可以為緬酋之忌憚。不可代敵戮仇也。按察使張坦麟審稱。宮裡雁雖堅供不知情。但勢窮來歸。先令妻屬詭計歸服。以致其刦掠罪有攸歸。且連年與緬酋擄殺。既經拏獲。斷不可仍留夷地之害。應正法。吳達善以前鞍不與。故切齒於雁。遂左袒張議。適緬酋至木邦。聲言前往整欠景線相戰。因遣頭目蟒散至孟連。索宮裡雁所脇從之緬人刀派永。悉將緬眾遣回。益知內地虛實。十月丁未。殺宮裡雁。以其妾婢分給功臣。吳達善既遂其志。乃檄緬人諭以宮裡雁業經誅殺。宮裡雁之妻擄占及兒目等。當即拏送。以靖餘孽。時擄占已嫁莽首弟惜駁。故緬人以為有心。羞指其

淫行益加忿恨。會木邦罕黑勾結。遂滋擾內地之耿馬。耿馬雖屬內地。於緬亦有歲幣。緬目普拉布率兵來索。闌入孟定。執土司罕大興。兵及茂隆。厥時永順鎮田允中調隣近各營官兵親率進剿。吳達善恐其連兵致敗。露其前事。乃飛檄田鎮責其輕率。遂還師。耿馬土司罕國楷率兵禦緬於石牛廠。厥委周德會。聞田允中進發。恃為屏障。率其廠練於滾弄江。截緬人歸路。擊殺普拉布。吳達善以周德會為殺良冒功。竟置之於法。而緬人益輕中國。二十八年十一月。緬人犯猛籠。莽紀覺既兼并諸土司。東之景線。整賣孟良整欠。皆以力戰迫脇附從。復言普洱之十三版納原隸緬甸。遣播定。昨寄緬文於車里宣慰司。索其貢獻。率賊眾至打樂隘口。猛遮撥練禦之。遂犯猛籠。劫掠村寨。猛籠不能禦。土弁刀乃占召彝等被害。普洱鎮劉德成領兵至思茅。遣兵前赴九龍江。吳達善飭調元江土練未至。次年春。緬賊始退。時復分兵至我遮放邊外。揚言來索木邦官。吳達善畏蕙。惟戒官兵不與之戰而已。會莽紀覺病死。賊乃退。三十年。莽紀覺死。其弟憎駁嗣。時賊勢愈肆強橫。其西之結些。南之白古大。姑拉。小姑拉。悉為其所據。是年賊犯普洱。普洱在省城之西南。幅員遼闊。與緬甸之孟良。猛勇。整欠。接壤。南通南掌。所屬有九龍江。車里宣慰司。及倚邦土守備六。困土

守備猛遮土千總。普藤土千總。猛阿猛籠。猛腊。猛旺。整董。猛烏。烏得土把總。大小十三土司。俗稱十三猛。又稱十三版納。其間九龍江。猛遮。猛阿猛籠。猛腊。並猛遮所屬之猛海。及九龍江所屬之橄欖壩。小猛。崙猛。彝補。角等處。均偏近外域。上年九月。匪首召播。率眾一百三十餘人。至九龍江。要車里宣慰司。前赴阿瓦會盟。時吳達善已調陝甘。總督為劉藻老儒也。不識事體。以王者須正疆理為言。命驅逐之。明年春。賊人飽颺始去。五月。賊眾復由整欠渡九龍江。至猛腊。烏得。猛烏。整董。猛旺。各土弁率眾驅逐。賊踞猛腊。猛彝。普洱鎮劉德成遣土目擒獲賊目叭信。波半。阿滬等。解審正法。是時緬酋雖恣肆。亦不敢抗官兵。實遣人於十三猛索賦。十三猛係雍正年招降。而亦輸賦於緬。叭信三人傳為在十三猛之貿易人。悉殲之。賊因憤而思逞。十月。緬賊復由整欠入猛彝。整欠頭目召教。其子召淵。與車里宣慰司為一族。車里所轄之猛彝頭目叭先彝。召教惡其不遜。遂糾緬賊攻之。孟良頭目召丙。召散。以同祖弟兄分掌其地。召丙。遂。召散。召約。頭目召猛。照。同攻。召丙。召丙。逃入內地之鎮沅府。乞降。召散。遂有孟良之地。後結緬賊。追逐。召丙。於是緬賊益出入九龍江一帶矣。十月。提督達啟由會城巡閱。赴普洱。十一月。抵普城。即聞賊耗。普洱鎮劉德成率本鎮兵。

八百名前往思茅一帶彈壓。提督移知總督，亦前往劉藻，即移兵茨通。提督達啟亦進駐思茅。劉藻聞緬人入犯，先遣後營遊擊明浩齎銀三千兩備犒。復遣標兵八百人，以甫抵任八日之叅將何瓊詔及員弁三十八人率之前往援剿。時緬賊西由孟艮入打樂，至猛遮九龍江，東由整欠至整哈渡，至橄欖壩，猛阿之整控渡亦復有賊。達啟分兵四出堵禦。何瓊詔明浩及守備楊崐帶兵一百人前赴猛阿。何瓊詔等素無備，止於江干守備楊崐率四十人於子刻先濟整控渡。何瓊詔等從之。至午刻，官兵悉渡。甫行數里，而楊崐兵已覆。瓊詔兵猝遇賊，各倉皇避匿。劉藻遂以何瓊詔陣亡入告。而何瓊詔及軍眾等後先由威遠所屬蒙撒江歸。劉藻復以聞。上察其詐，切責督臣，命鞫瓊詔等。三十一年，總督劉藻自殺。劉自遣標兵後，屢接提鎮啟稟，知賊勢已猖，欲躬往。按察使良卿復從臾之，止挈丞令陳元震、唐思等數員。午夜猝發，於除夕抵普洱。進駐思茅，乃檄調各營兵數千。是時瓊詔等已失事，賊勢日熾。傳烽逼近思茅城，劉乃退於普洱府治。劉本懦弱，既已前奏失旨，時分調各路兵之機，時發時止，人莫知所從，以致漫無經畫。會上以陝甘總督楊應琚調任，而降劉為巡撫。劉益懼，無所措手足。因於三月癸酉中夜挑燈默坐，驅侍者出，自剄不殊。宛

轉於牀榻間。七日乃死。三月所調兵已集。楚姚鎮華封具報。以召丙為嚮導。率兵由猛遮克孟艮。召散逃遁無踪。普洱鎮劉德成具報。以先彝為嚮導。率兵由檄攬壩至猛彝。副將孫爾桂具報。由車里至猛籠。會攻整欠克之。召教降。提督達啟由猛籠攻猛勇。召齊降。時瘴癘大作。賊眾亦退。是月丙戌。總督楊應琚至普洱。是日以捷聞。請賞給召丙以先彝三品指揮使職銜。管理土務。孟艮整欠各留兵八百名。猛散留兵二百名駐守。五月。提督達啟卒於軍。啟捍禦邊城。頗有勞績。時在孟艮受瘴癘卒。滇人思之。賓從無一存者。以李勳代。李至數月。亦受瘴卒。九月。猛龍沙人暨猛勇補哈猛撒等相繼內附。而總兵華封復招撫景線整賣孟艮小頭目等。詣軍門投誠。是年四月。楊應琚既綏定普洱。回省城。以前巡撫常鈞有莽案事畢。即辦木匪之奏。爰飭調文武及習熟外域情形者。至省商辦。騰越副將趙宏榜首陳木邦蠻暮各土司願內附。緬酋勢孤易取狀。騰越之西南為南甸干崖蓋達三土司。是即所稱三宣者。為騰越之屏翰。三宣之外為蠻暮。蠻暮之西為戛鳩猛拱猛養。東為猛密波龍。自騰越關外。復有止丹弄種各山寨。野人族類甚繁。是時聞各土司樂於內附。又傳言。憎駁之母。勸其子臣服。時有機可乘。趙宏榜楚人。少為波龍廠丁。習緬事。野人頭目。

皆與之善。總督楊應琚初弗聽。曰：吾官至一品，年逾七十，復何求？而以貪功開邊釁乎？趙宏榜復慫恿之。楊信其言。於是令道鎮府州官各議。迤西道陳作梅、永順鎮總兵烏爾登額、永昌知府陳大呂皆議以賊勢甚大，邊釁不可開。騰越知州陳廷獻則銳意進取。楊應琚怒阻議者。陳大呂懼，改初議。烏爾登額阻益力。書凡七上。楊滋不悅。而陳大呂、陳廷獻革職。開化同知陳元震即馳檄緬甸，號稱合各國精兵五十萬，大砲千尊，有大樹將軍統領，以震懾之。又密布牒，分遣通事至各土司說降。初，楊應琚議檄調官兵八千人。至是祇調三千人。俟八月到永昌。蠻暮木邦降後，其附近各土司再相機辦理。六月，趙宏榜帶兵五百名抵鐵壁關。陳元震遣人至蠻暮時土司瑞團，赴阿瓦未歸。其母妻及弟坤商以所屬五六十寨三千餘戶請降。宏榜遂率二百人襲蠻暮之新街。一鼓克之。坤商率頭目於七月甲午赴永昌。途次為趙宏榜要至軍營。宏榜於關外撫止，丹弄種六醋喇痛邦領蚌林暮習魯緬喇同草朶習董各山寨野人。八月乙卯，陳元震以憂鳩允冒投降頭目線蔑猛捧甕撒老安等男婦五人解報。陳廷獻報猛密土司亦欲乞降。遂關請永順鎮調集兵馬欲領赴猛密。未行。而趙宏榜先於七月內赴新街。瑞團自緬甸回至速帕請降。猛密所屬之猛連壩

頭目線官猛赴新街軍營請降。趙宏榜又遣人招撫猛拱猛養。九月木邦降。先是木邦既屢遭兵而屬緬首立困相為頭目。又執木邦土司罕宋法之弟罕蟒立於阿瓦城以為質。復立者皆以監之者皆者。緬官名也。既而罕宋法殺困相等三十餘人。乞內附。會罕宋法即死。時者皆尚在木邦。木邦夷眾請立其弟線瓊團。緬首不允。又執其土舍法坤象。傳聞於內地。緬甯通判富森招之。然瓊團亦未敢驟降。未幾其侄線五格為質於阿瓦。聞木邦變。殺守者竄歸。瓊團於是內附。富森并招撫緬甯以外犴狽。帶其長至永昌。俱加褒獎。時緬首已調遣賊眾數萬分道四出。一由蠻暮。一由猛密。猛育。一由木邦。一由滾弄江。於木邦之猛樟大視罕錫箔宋寨等處。皆駐有重兵。我兵定議以禦之。是月總督楊應琚赴永昌受降。時陳大呂等以蠻暮之新街。距緬甸水陸之衝。自新街下速帕。水路四五日可到緬甸。自猛密波龍陸路。七八日可到緬甸。計日可望成功。趙宏榜兵前已在新街。新街在鐵壁關外。江干為互市之所。兵丁受暑者多。緬賊於八月中旬遣頭目覘軍營。為乞降狀。趙宏榜不察。犒而遣之。時新街兵少。各路警報時至。楊應琚乃飭永順鎮都司劉天佑。騰越都司馬拱垣。領兵四百餘。自翁冷出關。於九月庚午到新街。丁亥。趙宏榜方祭纛饗士卒。緬賊乘船猝

至帆檣啣接。倏忽蜂擁蟻屯者數千人。登岸攻柵。翌日賊勢益張。都司劉天佑死之。趙宏榜力戰相持者兩日。一夜官兵被困不能禦。趙宏榜收病傷各兵同軍械於草房內焚燒。乃與馬拱垣等潰圍間道。由野人寨退駐鐵壁關。瑞團至鐵壁關。趙宏榜安置於隴川。其族屬人民遁出關外野人村寨。時總督楊應琚方行次永平縣之太平鋪。聞警報即遣疾。乃加調官兵分剿。十一月。永北鎮朱崙進攻楞木不克。退守隴川。是時東路永順鎮烏爾登額帶兵至宛頂。欲進攻木邦。西路永北鎮朱崙帶兵駐鐵壁關。欲進攻蠻暮。以復新街。雲南提督李時升於十一月甲戌自永昌起程。辛巳至鐵壁關。緬賊自新街至林岡固守。我兵四千餘人亦於楞木山頭分佈七營。壬午朱崙出鐵壁關。癸未至楞木。緬賊請於次日會戰。甲申卯刻賊約二萬眾喊叫前進。我兵營柵踞山之巔。向下施放鎗礮。殺賊甚眾。賊復緣箐盤繞。向上仰攻。我兵施放連環鎗礮。殺賊數千而不退。朱崙見賊勢猖獗。至丁亥相持者四日。請援甚急。提督李時升撥宛頂兵七百名赴援。是日我兵出柵下攻。賊佯敗。山腰礮火起。官兵受傷者二百餘人。戊子賊張象皮擋牌。自辰至午。方放連環鎗。擋牌忽撤。已立營柵一座。蓋逼近大營。李時升告急於楊應琚。不應。己丑官兵堅壁不出。庚寅賊詐為乞罷兵。